

陝西 省

靖邊縣志稿

(一)

中國方志叢書·華北地方·第二九七號

據


清·丁錫奎修白翰章纂
清·光緒二十五年鉛印本

影印

陝西 省

靖邊縣志稿

(一)



成文出版社有限公司印行

光緒己亥年刊

靖邊志稿

板藏縣署

靖邊志稿序

靖邊近河套在前明爲靖邊衛重於屯兵以禦外侮我

朝

蒙古內屬改衛爲縣則休養之意多也至同治初渭南獮匪作

亂延及北山各郡縣靖邊亦陷於賊兵燹之後元氣迄未能復

宰是邑者睹民生之彫敝宜思撫綏士氣之頽唐宜思振作田

野之荒蕪宜思墾闢商賈之寥落宜思招徠凡所爲利宜興弊

宜除者皆良有司是賴秦安丁黼臣大令宰靖邊三年以靖邊

志稿成屬序於余是必大令於撫綏之德振作之方墾闢之功

招徠之術已獲有成效而始出餘力以著此志也近代各牧令

視一官如傳舍簿書奉行苟求無過遂爲盡職矣大令勤於其

官卽一志乘之成已精心果力如此則夫平日於地方公事興利除弊其有志竟成固何如耶大令可謂造福靖邊者矣余嘉大令自待之厚不同俗吏故樂爲之序大令自謂喜讀康對山武功志胡可泉秦安志對山武功志王文簡公所謂文簡事賅訓詞爾雅者也大令旣喜讀之則此志與對山書或閒有出入大令可復按而自得焉勿俟余贅言也

光緒二十五年己亥四月八日陝西承宣使者萍鄉李有棻拜敘

靖邊志稿序

余同年丁君黼臣以進士試吏於秦得延之靖邊隨牒到官今三年矣地介朔徼蒙番錯處崩沙斷磧耕牧都稀而君顧孜孜爲治勤靡餘勞並以其暇成邑乘四卷郵書示余乞弁言首簡諒哉君之爲邑不以窮僻槁瘠之故而鄙夷弗屑也靖自我

朝雍正九年始升爲縣由是而上在勝國爲屯宿重兵之所遞設通判同知等員又嘗以按察副使駐節其地典城理任屹然巖要又其上淪棄異域與蕃部相出入者最久又其上當興午拓跋之間建郡立縣尋寘尋廢遷徙區并靡所於稽故志靖以雍正爲盤古云竊怪胥宇百六十有九年臨之以官司範之以校

序而屯盲否塞僞荒終古抑獨何歟比來殊種非族闌入中土
象胥重譯其自埃及而羅馬而歐洲壹切規畫粲然可覩而河
西上郡夙稱殷阜旣自拔於夷夏之交冠帶自治重以

天子

之命吏風聲西被乃不克爭自濯磨蟠然係於文教豈裸民孽

俗不可以戶說耶抑無賢有司躬爲葦路之啓與之更始而鼓
舞之之故耳然則君之創爲是志也其用意不誠深且遠哉顧
余更有進者吾夫子論鄭之爲命自草創而後若討論若修飾
若潤色次第經畫汔用有成言之不可易也如是今觀是書發
凡起例創始之功誠偉矣後有賢令尹當必隨時增訂以馴致
其討論修飾潤色之功而文章治化有美備日臻焉者區區就

稿中所見及附證一二置諸凡例之後質之黼臣應亦樂聞予
言而不以爲謬也夫

光緒二十有五年己亥五月陝西按察使溇陽端 方譔

靖邊志稿序

嘗觀欲蔽一事因前猶易而初始獨難矧一方舊志兵燹無存
邊境遐荒無多攷據乎然志乘之傳使後之覽者備悉山川之
險易土田之肥磽戶口之增減風俗之美惡與夫歷來仕宦人
物之賢否優劣因是驗沿革得失而圖治焉是不可以弗講余
於光緒丁亥履任之始卽調取各屬圖志圖僅繪其大致志則
多以殘缺散失脩輯不遑良用慨然甘省秦州丁君輔臣光緒
壬辰進士以卽用儘先知縣於光緒丙申到靖邊任舉凡興利
除弊因地制宜力能爲者悉心籌畫無怠弛茲以靖邑志告成
囑余爲序一再展讀卷編爲四門分十二大綱細目井井有條

曷勝忻慰爰攷黃河套內秦以前置域非盡隸中土自秦咸有黃河以南之地築長城環出河北河套內之地歷漢晉隋唐宋元互有得失迨有明成化始築邊牆迄今東起晉邊黃河畔西抵甘邊橫城口邊牆綿互一千二百餘里接壤鄂爾多斯仍明之舊該旗明之敵國我之藩服邊牆內神府榆懷屬榆郡靖定屬延郡惟是經歷代收復終未淪於外番而其間每裁併改置故事則荒徼無稽亦且今昔異宜光緒甲申延安劉守樹人慨府志之就湮網羅纂輯足臻美備特所轄寥廓兼及屬縣未獲周詳斯卷專爲斯邑而成索志略遺文不可得迺搜殘碑證故老更資紳士之夙所識聞於無可徵信中求徵信實與剏始無

異莅任三載而書卽成補斯邑之缺陷於以見賢勞盡職不畏
難而阻且欲異日治斯邑者咸知山川形勢何如樹藝何如生
齒何如民風士習何如有所適從而設施得當前勞後逸裨益
良多卽余攷察吏治昔日之撫衷歆然者今不且披書了然而
不患茫無依據也哉是爲序

光緒二十五年歲次己亥孟秋上澣

賜進士出身分巡延榆綏兵備道馬相如撰

靖邊志稿序

詩亡然後春秋作春秋所以繼詩之亡也史亡然後志作志又所以繼史之亡也故

國有一統志省有志郡縣皆有志凡星野沿革古蹟山川形勢風俗物產宏綱巨目纖微曲折靡不畢載閱者未入境而瞭然在目蓋非徒貢博瞻也俾宰是邑者得知其民情土宜以善爲撫字所繫不綦重哉往年余權延榆綏道篆搜羅境內志靖邊闕如詢其故或曰失所傳也或曰燹於兵也吁文獻無徵宣聖致慨典型不在詩人嘆惜祇付諸抱殘守缺而已己亥夏僚友景紫垣觀察持靖邊

丁黼臣明府手創邑志十二卷徵序於余以待梓余樂讀焉則

疇昔之念遂而一邑星野之所分沿革之所辨古蹟之所存山

川形勢之所名所在風俗物產之所尙所成燦然了然以是知

丁君真學優才裕而深識治體也矧是志也前無因旁無攷左

右無贊襄獨以訪察故老參酌羣籍掇殘文於斷碣探往蹟於

荒煙卒能薈萃成書必使人信不涉牴牾疑似僞錯挂漏之弊

其有益吏治亦何減於一統省郡諸志哉

賢邑侯殆深明春秋繼詩之義也夫

光緒二十五年己亥四月中浣在任候補道西安府知府童兆

蓉拜叙

靖邊縣志稿序

凡事前有所因曰修前無所因曰創創不難於修乎哉况舉一
邑建置之本末山川之險易古蹟之留遺戶口物產之盈虛增
減學校風俗之盛衰醕薄稽諸簡編則無據訪之故老則失傳
修無從修創難爲創雖使班馬復生詎易成書而關中夙推喬
呂康韓王張諸君子又未必不棘手耶余鄉
丁君黼臣少從鄉先達牛雪樵廉訪遊馳名蜀中錦江課藝
多選梓及成貢士官靖邊余爲鄜延守因公聚談輒以靖邑無
乘爲憾奈地處荒服屢遭兵燹學校陵夷典籍灰燼此真前無
從修後難爲創者也余及瓜代之明年

求旃卒弗獲迺公退之暇搜羅

余

遺檔摭拾斷碣旁求延安榆林保安各志參互攷訂薈萃成書

將付手民間序於

余余

自慙葺陋然誼係梓桑義不容辭且諗

黼臣之賢捐廉俸以興學校冒風雨以勸農桑嚴胥吏以清獄訟實心實政美不勝收而是志之成俾一邑沿革山川古蹟戶口物產學校風俗井井燦列則前志之失傳者不終湮沒後志之踵事者有所考証是喬呂康韓王張之志爲其修而又有贊襄者功較易

黼臣之志爲其創而久無採訪者勢更難也古人可作何多讓焉都人士沐

黼臣之澤體

黼臣之心將來富庶可期人才蔚起是

黼臣不負

朝廷命官之典而邑人不負

黼臣栽植之恩也

余實有厚望焉

光緒二十五年歲次己亥仲呂月上浣吉日花翎三品銜

特用道前延安府知府平襄景星燿拜譔

靖邊志稿序

國史外有通志通志始於郡縣志而郡又始於縣縣志顧可缺乎哉獨是作志難作創志尤難有舊志而續修一切規模具在不過釐正其失補苴其缺略增益其昔所無今所有而已矧則無基可因自我作古非心係地方力任著作廣爲採訪勤爲蒐羅且有敷政優優之暇殫以窮年累歲之功不能辦嗚乎此其所以難也余曩承乏是邦垂十稔各屬之山川風土略能知梗概每樂與屬邑諸君子商舉廢墜曾以郡志殘缺而補刊之庶足備十邑之圖籍而獨惜靖邊無志竊以爲憾靖邊自雍正九年併五堡爲縣歷乾嘉道咸同數朝距今百六十餘年矣